



Broj: 01-04-345-5/22

Fojnica: 10.03.2022. godine

Na osnovu člana 16. stav 1. tačka 1) i člana 165. Zakona o zaštiti od požara i vatrogastva („Službene novine Federacije BiH“, broj: 64/09 ), člana 44., 45. i 154. Zakona o zaštiti od požara i vatrogastva („Službene novine SBK“, broj: 15/12 ) i člana 24. Statuta općine Fojnica – Prečišćeni tekst („Službene novine općine Fojnica“, broj: 2/15) Općinsko vijeće Fojnica, na 11. sjednici održanoj 10.03.2022. godine, donosi

## **ODLUKU O USLOVIMA I NAČINU SPALJIVANJA KOROVA, SUHE TRAVE, RASTINJA I BILJNIH OTPADAKA NA PODRUČJU OPĆINE FOJNICA**

### **I. OPĆE ODREDBE**

#### **Član 1.**

Ovom odlukom utvrđuju se mjere za sprječavanje i širenje požara na otvorenim prostorima poljoprivrednom i šumskom području, trasama elektroenergetskih vodova plinskih i telekomunikacijskih vodova i trasama putnih pravaca, te na javnim površinama i okućnicama u naselju pri spaljivanju korova i suhe trave, ostatka od usjeva, suhog žbunja, rastinja i biljnih otpadaka u slučajevima kada bi propuštanje tih mjera nanijelo štetu poljoprivrednim ratarskim kulturama, nasadima, voćnjacima, instalacijama i uređajima, ogradama i zgradama od zapaljivog materijala i ugrozilo odvijanje putnog saobraćaja stvaranjem dimne zavjese, te zabrana spaljivanja određenih vrsta materijala.

#### **Član 2.**

Prava, obaveze i odgovornosti utvrđene ovom Odlukom odnose se na pravna i fizička lica, vlasnike i posjednike poljoprivrednog zemljišta, pravna i fizička lica koja čiste vegetaciju na kanalima, ispod trase vodova, na trasama pojaseva, te na otvorenom prostoru javnih površina i okućnica u naseljima.

#### **Član 3.**

Spaljivanje korova, suhe trave, rastinja i biljnih otpadaka u smislu ove Odluke je uništavanje istih pripaljivanjem vatre i kontrola izgaranja dok se vatra u potpunosti ne ugasi, a bez opasnosti za nastanak i širenje požara i ugrožavanje života ljudi i imovine vatrom i dimom.

### **II. MJERE ZAŠTITE OD POŽARA**

#### **Član 4.**

Zabranjeno je spaljivanje na udaljenosti manjoj od 100 metara od ruba šume, 15 metara od zgrada, te u trasama elektroenergetskih, plinskih i telekomunikacijskih vodova tako da

spaljivanje, izgaranje gorivih materija i širenje dima ugrožava susjedne poljoprivredne kulture, usjeve, nasade, voćnjake, kao i objekte, te odvijanje putnog saobraćaja stvaranjem dimne zavjese.

#### **Član 5.**

Tokom godine, prije i nakon završene žetve, uništavanjem korova, suhe trave, rastinja i biljnih otpadaka, obavezno je poduzeti posebne mjere zaštite od požara i to:

- zabraniti spaljivanje tamo gdje prijete opasnost od izbijanja požara,
- obezbjediti protiv požarne prepreke (preoravanje),
- po potrebi organizovati dežurstvo,
- spaljivanje vršiti uz prisustvo potrebnog broja lica sa sredstvima i opremom za početno gašenje požara, isključivo danju i po mirnom vremenu bez vjetera uz poduzimanje mjera za zaštitu od požara na otvorenom prostoru.

Za vrijeme visokih temperatura u sušnom periodu zabranjuje se spaljivanje bilo kojih vrsta otpada na području općine Fojnica.

#### **Član 6.**

Pravna i fizička lica koja čiste vegetaciju na kanalima, ispod trase energetskih vodova, na trasama puteva, plinovoda i telekomunikacija te na otvorenom prostoru javnih površina, pravna i fizička lica, vlasnici odnosno korisnici poljoprivrednog i drugog zemljišta, dužni su prije spaljivanja korova, suhe trave, suhog žbunja, i ostataka od usjeva i ostalog biljnog otpada preduzeti odgovarajuće mjere opreza, osigurati odgovarajuća sredstva, te preduzeti mjere zaštite u skladu sa propisima o zaštiti od požara, a posebno:

- izvršiti pismenu prijavu za spaljivanje u skladu sa odredbama ove odluke,
- spaljivanje obaviti tokom dana, za mirnog vremena bez vjetera i povišenog pritiska,
- osigurati da suha trava, suho žbunje, ostaci od usjeva i drugih biljni otpad, ovisno o količini i zapaljivosti bude dovoljno udaljen od drugih objekata ili površina sa zapaljivim materijama,
- na poljoprivrednom zemljištu spaljivanje korova, suhe trave, suhog žbunja, ostatke od usjeva i ostali biljni otpad, spaljivati samo na odgovarajućim mjestima i uz preduzimanje odgovarajućih mjera opreza,
- osigurati spaljivanje ostataka bilja nakon žetve, odnosno berbe, te drugog lako zapaljivog biljnog otpada na poljoprivrednom zemljištu odvajanjem od susjednog zemljišta preoravanjem pojasa širine najmanje tri (3) metra,
- stalno neposredno nadzirati spaljivanje sve do potpunog gašenja vatre na cijeloj zapaljenoj površini,
- tokom spaljivanja osigurati potreban broj ljudi, odgovarajuću opremu i sredstva za zaštitu od požara, ovisno o obimu i vrsti otpada koji se spaljuje,
- preduzeti i druge mjere za zaštitu i sprečavanje mogućnosti širenja požara na susjedne površine.

#### **Član 7.**

Pravna i fizička lica iz stava 1. prethodnog člana ove odluke dužna su prije spaljivanja biljnih i drugih tvari u većem omjeru i na većim površinama, kojim bi se moglo ugroziti druge površine ili objekti (industrijske građevine, postrojenja, stambene i druge objekte, električne i



telefonske stubove i vodove, prometnice, poljoprivredne i šumske površine i sl.), prijaviti najbližoj policijskoj stanici, DVD ili Službi za civilnu zaštitu i inspekcijski nadzor.

Prijava treba sadržavati slijedeće podatke:

- ime i prezime lica koje obavlja spaljivanje
- vrijeme i veličina površine spaljivanja,
- broj lica koja će obavljati spaljivanje,
- vrsta biljnog otpada koji se spaljuje,
- preventivne mjere zaštite od požara koje će se preduzeti pri spaljivanju,
- opremi za gašenje požara.

Nadležni organ kojem se podnosi prijava zabranit će se spaljivanje biljnog otpada ukoliko nisu ispunjeni svi uslovi i poduzete odgovarajuće mjere zaštite od požara utvrđeno ovom odlukom, te upoznati podnosioca prijave s razlozima zabrane.

#### **Član 8.**

Spaljivanje manjih količina otpadnih tvari biljnog porijekla koje objektivno ne mogu ugroziti druge objekte ili površine, pravna i fizička lica nisu obavezna prijaviti, ali su obavezna preduzeti sve potrebne mjere da se vatra ne proširi na susjedne objekte ili površine.

#### **Član 9.**

Lica koja su obavila spaljivanje dužna su ugасiti vatru na otvorenom prostoru i pregledati ostatke vatre prebacivanjem pepela, polijevanjem vodom i primjenom drugih sredstava za gašenje, dok se vatra ne ugasi u potpunosti i tek nakon toga napustiti mjesto paljenja.

### **III. ZABRANA PALJENJA ODREĐENIH VRSTA MATERIJALA**

#### **Član 10.**

Pravnim i fizičkim licima navedenim u članu 2. ove odluke zabranjuje se spaljivanje predmeta od gume, plastike, kože, prerađevina od ulja, maziva, te otpada na bazi hemijskih spojeva koji na bilo koji način utječe ili mogu utjecati na onečišćenje okoliša.

### **IV. OBAVJEŠTAVANJE GRAĐANA**

#### **Član 11.**

Policijska stanica i Služba za civilnu zaštitu i inspekcijski nadzor dužni su redovno obavještavati građane o postojanju opasnosti za nastanak i širenje požara putem sredstava javnog informisanja.

### **V. NADZOR NAD PROVOĐENJEM MJERA ZAŠTITE OD POŽARA**

#### **Član 12.**

Nadzor nad provođenjem odredbi ove odluke i izricanje kazni propisanih članom 13. ove odluke vršit će PU Kiseljak - Policijska stanica Fojnica.

U nadzoru sudjeluju ovlaštene predstavnici pravnih lica koja upravljaju i gospodare šumama, čuvari šuma, ovlaštena lica DVD, nadležna inspekcija (šumarska i poljoprivredna), Kantonalna čuvarska služba odnosno (Kantonalna uprava za šumarstvo), a u smislu dojave o nastalom požaru, šteti i povredi odredaba Zakona o zaštiti od požara i vatrogastva i ove odluke, te prikupljanju podataka o identitetu lica koja su izvršile povredu.

Građani općine Fojnica su u smislu dojave o nastalom požaru dužni izvijestiti Policijsku stanicu Fojnica, DVD ili Službi za civilnu zaštitu i inspekcijski nadzor.

Dojava treba da sadrži slijedeće podatke:

- ko obavlja spaljivanje,
- naziv i veličina površine spaljivanja,
- broj lica koja obavljaju spaljivanje,
- vrsta biljnog i drugog otpada koji se spaljuje.

## **VI. KAZNE NE ODREDBE**

### **Član 13.**

1) Novčanom kaznom u iznosu od 500,00 do 5.000,00 KM kaznit će se za prekršaj pravno lice:

a) ukoliko se vrši spaljivanje na udaljenosti manjoj od navedenog u članu 4. ove odluke, te na trasama elektroenergetskih, plinskih i telekomunikacijskih vodova,

b) ako se obavlja spaljivanje na otvorenom prostoru noću i po vjetrovitom vremenu,

c) ako ne izradi i ne dostavi prijavu iz člana 6. ove odluke, ako u vremenu spaljivanja ne obavijesti DVD ili Služba za civilnu zaštitu i inspekcijski nadzor, te ako protivno zabrani izvrši spaljivanje,

d) ako ne provede preventivne mjere zaštite od požara i ugrozi vatrom i dimom poljoprivredne kulture, nasade, šume, nadzemne elektroenergetske, telekomunikacijske i plinske instalacije i uređaje, ograde i zgrade od zapaljivog materijala i odvijanje putnog saobraćaja,

e) ako je vršilo spaljivanje i napustilo mjesto spaljivanja prije nego što je vatra ugašena u potpunosti,

f) ako postupi protivno zabrani iz člana 10. ove odluke.

2) Za prekršaj iz člana 13. stav (1) kaznit će se i fizičko lice novčanom kaznom u iznosu od 100,00 do 1.500,00 KM.

### **Član 14.**

Na osnovu učinjenog prekršaja kažnjivog po odredbama člana 13. ove odluke, može se od prekršioaca naplatiti stvarno prouzrokovana materijalna šteta u skladu sa odredbama pozitivnih propisa, kojima se reguliše naknada štete, a za ostale nepredviđene situacije, primjenjivat će se i drugi pozitivni zakonski propisi, shodno vrsti počinjenog djela.

Za učinjeni prekršaj može se prekršiocu uz novčanu kaznu izreći i zaštitna mjera u skladu sa Zakonom o prekršajima F BiH.

Novčane kazne izrečene i ostvarene po odredbama ove odluke, prihod su Budžeta općine Fojnica.

## VII. ZAVRŠNE ODREDBE

### Član 15.

Ova odluka stupa na snagu danom donošenja, a objavit će se u „Službenim novinama općine Fojnica“.

**PREDSJEDNICA  
OPĆINSKOG VIJEĆA FOJNICA**

  
**Vanja Oroz Jukić, dipl. log i surd.**

